

Ingoa: _____ Rangi: ____/____/____

Mōkai Ihu Penu

nā June Tangaere

Kahukura

He poti tā Kui rāua ko Koro, ko Penu tōna ingoa. Nā te tino parehe o te ihu o te poti nei, ka whakaingoatia a ia ko Penu. I hoatu e mātou te poti nei ki ō mātou tīpuna, i te wā e kūao tonu ana a ia, hei hoa mō rāua, kia kore ai rāua e mokemoke.

He tino roroa, he tino ngohengohe ngā huruhuru o Penu. He tino pai ki te mirimiri. E hiahia ana a ia kia atawhaitia i ngā wā katoa e Kui rāua ko Koro. Pātata atu ana ki te wā parakuihi a Kui rāua ko Koro, kei konā a Penu e tatari ana mō tāna parakuihi.

Kotahi tonu tana horonga i āna kai, pau tonu atu. He tino pai ki a ia te kai ika me te inu wai. Mehemea kei waho ōku tīpuna i tā rāua kāri putiputi e ngaki ana i ngā tarutaru, kei konā a Penu e whakatakataka haere ana i raro i ngā pua me ngā rau.

Mehemea ka noho ōku tīpuna ki raro i te marumaru o te rākau ki te whakangā, kei konā anō a Penu e rakuraku ana i te kiri o te rākau. Mehemea ka marangai a waho, ka noho ōku tīpuna ki rō whare. Kei konā anō a Penu e whāroaroa ana i runga i te whāriki, i mua hoki i te ahi.

I te hekenga o te pō, ka whakareri ōku tīpuna ki te haere ki te moe. Ka puta a Penu ki waho, ā, ka moe ōku tīpuna. Ka oho ake rāua i te ata hāpara, kei konā a Penu e moe kōrino ana. He pai ki a Kui rāua ko Koro te mirimiri i tā rāua mōkai, ā, he tino pai rawa atu hoki ki a Penu tā rāua tino atawhai i a ia.